

mas-chalch


gazetta da la Val Müstair



Il tema dal mais

LA GUIDA DA VIANDAR DA LA BIOSFERA

Severin Hohenegger (1962) es nat e creschü sü in Val Müstair, ingio ch'el ha eir frequentà la scoula primara e secundara. El es maridà e bap da quatter uffants creschüts. Davo avair absolt il giarsunadi da falegnam e plü tard la scoula da



per ingaschamaints da lavurs praticas. I'l fratemp es Severin Hohenegger dvantà independent ed ha fundà sia aigna dit-ta. Daspera instruischa el ün di l'eivna a giarsuns falegnams illa scoula industrial a Sta. Maria e's dedichescha sco guida da viandar da la Biosfera, ma eir sün basa privata, per gronda part per giasts per l'hotel Staila, Fuldera (partenari Biosfera).

Severin Hohenegger es ün grond amator e cugnuschidur da la natüra. Il plaschair per quella ha'l fingià surgni d'uffant, cun pudair accumpognar a seis bap a chatscha e pes-cha. E schi's ha il privilegi da pudair viver in üna natüra amo uschè intacta sco in Val Müstair, es quai ün regal per el, ün regal ch'el pirta gugent cun otra glieud interessada, chi tilla accumpogna sün sias spassegiadas, tils muosand las bellezzas da sia stretta patria.

PREMISSAS PER ABSOLVER LA VOCAZIUN DA GUIDA DA VIANDAR

Che douvra quai vairamaing per premissas per pudair absolver ils examens per dvantar üna guida da viandar cun certificat professional?

maister a Bienna, ha el lavurà illa falegnamaria da seis bap, plü tard in l'affar cun seis frars a Fuldera. Cun ir dals ons ha Severin Hohenegger müdà professiun ed es uschè rivà pro'l Parc da natüra, il prüm illa administraziun e plü tard sco manader d'excursiuns e respunsabel

I pretenda la finischun d'ün giarsunadi cun diplom, i bsögna la cumprova d'avair guidà i'ls ultims trais ons, d'ürant almain 200 uras a gruppas sün gittas. Ultra da quai nu pon esser registradas ingünas annotaziuns i'l register penal, voul dir, l'interessà per far la scolaziun da guida

da viandar sto pudair preschantar ün'at-testat da buna conduita.

IL CONCEPT DA SCOLAZIUN/ MODULS

La scolaziun vain sporta davart da la Cumünanza grischuna per sendas e düra 1 – 3 ons sco scolaziun cumplementara a la professiun (berufsbegleitend).

Davo cha'l interessà es gnü valütà sur da seis stadi corporal e da sias cugnuschentschas davart la natüra ed ambi-aint, ha e la pussibilità d'absolver differents moduls, sco per exaimpel sur da la medicina, da la natüra e cultura alpina. Ils moduls da stà e d'inviern vegnan cumpletats cun gittas da gruppas, in accumpognamaint d'üna guida da viandar diplomada o d'üna guida da muntogna diplomada. La differenza tanter üna guida da viandar e quella da muntogna, es, cha la guida da viandar as mouva in lös chi nu bsögna mezs d'agüd sco per exaimpel suas e zappunets. Per gittas illas muntognas otas, per turas sün sendas inferradas o per turas chi'd es da rampignar, sun las guidas da muntognas plü cumpetentas.

D'ürant ils ons 2017 – 2018 ha Severin Hohenegger visità ot moduls (3 d'inviern e 5 da stà), totalmaing 32 dis da scolaziun. Ultra da quai ha el stuvü absolver divers dis da profuondaziun ed ospitaziun cun differentas lezchas, planisaziuns, guidas e rapports. A la fin ha el surgni ils

certificats correspundents davart da la Cumünanza grischuna per sendas culla conferma d'avair conclus tuot ils moduls frequentats cun success. Ils examens finals dals moduls da stà e d'inviern han gnü lö illa regiun dal Scanveg (Schanfigg) e dal Pass dal Güglia.

IL MAS-CHALCH ACCUMPOGNA LA GUIDA DA VIANDAR SÜN TURA


In cunvegna cun Severin Hohenegger e cun seis giasts, m'esa stat pussibel d'accumpognar ün di ad el sün üna da sias turas. Als 15 october 2021 es planisada la gitta cun Madeleine e Jürg Flückiger, insembel cun lur abiadi Thierry, illa bella



Val Mora (la famiglia Flückiger abita illa regiun da Luzerna ed es perincletta da gnir manzunada in quist artichel). Quista gitta es gnüda regalada da bazegnar e nona a seis abiadi. Il tema da la gitta es: Observaziun da sulvaschina cun differentas interpretaziuns sur dal lö. Il puobet dad 11 ons ha nempe fich grond interess vi da la natüra e perquai d'eira quai evidaint da til far uschè ün regal, dischan bazegner e nona Flückiger.

Nus s'inscuntrain a las 07:30 pro la plazza da parcar a Plazzerau. Davo ün salüd s'instradaina in direenziun Val Mora. Cuort davo il Spi da Vau traversa üna vacha da tschiervi la via, quai chi fa glüschir hoz per la grüma jada ils ögls da Thierry. Nus cuntinuain cun nos viadi fin sün Döss Radond, ingio cha nus fain nossa prüma fermativa. Quia raquinta Severin Hohenegger l'istorgia da la Mumma veglia. I's tratta d'ün crappel chi sumaglia ad üna mamma cun ses uffants. L'uffant chi va pella prüma jada ad alp sto dar ün bütsch ad ella, uschi gliö vegn ella pro l'uffant e til transmüda in ün crap. Minch'uffant dad 8-10 ons d'eira bun dad ir cul muvel da Müstair fin pro l'Alp Mora, eir schi d'eira ün lung e stantus viadi. Il mumaint il plü important pels mats d'eira quel di da la chargiada d'alp il dar il bütsch a la Mumma veglia. Grazcha al bütsch stavian ils uffants suot protecziun speciaia cunter ils spiert da la Teja Fondada e cunter las sajettas dal Döss Radond. Natüralmaing cha eir Thierry ha vugliü dar ün bütsch a la Mumma veglia, davo avair dudi quista istorgia captivanta.

Ma eir sur dal Döss Radond s'vess sà la guida da viandar raquintar robas fich interessantas, tanter oter sur da seis



Mumma veglia

origin. Il Döss Radond es gnü fuormà in consequenza da la glimada da glatscher ed es ün territori cun trais sparta-auas continentalas. L'Aua da Val Mora fluiska davent da là ill'Ova dal Gall, i'l Lago di Livigno, i'l Spöl ed inavant i'l En, illa Donau e sbocca finalmaing i'l Mar Nair. Da l'otra vart dal Döss Radond sbuorfla ün aualet chi fuorma plü tard l'Aua da Vau, chi sbocca aint il Rom, quel aint ill'Adisch, davo aint i'l En, illa Donau e sbocca a la fin i'l Mar Adriatic. Da la vart taliana as rechatta il Lago Forcola. Quell'aua riva aint i'l'Adda, plü tard aint il Po e sbocca eir aint il Mar Adriatic.

Nossa gitta cun l'auto cuntinuescha fin visavia l'entrada da la Val da Teja Fondada, quella val cha nus lain visitar hoz. La quietezza chi regna quia illa Val Mora es indescrivibla. Quella vegn be qua e là interruiotta d'ün tschübel da l'aglia chi's lascha portar dal vent illas otezzas, obain

d'alch grofal da l'Aua da Val Mora, dal rest regna silenzi. Illa vallada prospere-scha il god da muntogna, chi's cumpuona da müfs, dschembers e zuonders. L'ur dal god es quia ca. sün 2'300 m. L'ütillsaziun dal god nun ha praticamaing plü lö. In vicinanza da la Stretta as rechatta üna palü da muntogna (Hochmoor). L'on 1979 es la Val Mora gnüda missa suot protecziun, cun gnir repartida illa zona pella protecziun da la cuntrada. Ils partecipants da la Bassa giodan in möd intensiv las bellezzas da la natüra e respiran la savur, la quietezza, e la pürezza da la cuntrada chafuol in lur pulmuns. Els as schmüravaglian da tuot quai chi vezzan e dodan da lur manader da viandar. Cul spejel lung das-chna observar ün bel boc da chamuotsch ed ün boc da capricorn plü vegl, chi pasculeschan in tuotta calma sül Munt Pitschen. Severin Hohenegger tils declera il möd da viver da quistas duos bes-chas fascinantas, sur da la chatscha, sur da la biologia, sur dal cresch da las cornas, sur da la valütaziun da l'età, ed oter plü. Sün dumondas respuonda el in möd cumpetent.

Culla buscha sülla rain s'instradaina in direenziun Val da Teja Fondada. A l'ur d'üna foura a fuorma da chaldera faina üna prüma fermativa. Quia raquinta Severin Hohenegger sia versiun da la legenda da la teja sfuondrada, uschè co ch'el ha dudi d'üna persuna plü veglia da Müstair. Co chi vegn dit as rechattaiva quia ün'excellent'alp, la megl'dra da tuot ils cuntuoorns. Giosom l'era da l'alp d'eira üna teja. Ün di es passada ün povra duonna cun ses uffants tras quella cuntrada. Ella s'ha fermada pro la teja ed ha dumondà la charità. Ma il signun d'eira ün hom grosser e malamaivel. El nu tils ha dat inguotta ed ha tramiss davent a

la mamma cun uffants cun blastemmas e schmaladicziuns. La povra mamma e'ls uffants sun its inavent ed han inscuntrà pac toc davent al suotsogn. Quel s'ha laschà gnir puchà dals povrets e tils ha dat da sia marena. Il sogn ha vis quai ed ha cumanzà da blastemmar e schmaladir uschè ferm, fin cha in ün dandet es la teja sfuondrada aint il terrain. In quel lö es uossa il puoz in fuorma da chaldera. In sairas s-chüras però – ant chi vegna trid'ora – as doda amo hoz bain avuonda co cha'l sogn struscha e cultiva las chaschoulas giò la chafuolezza da quella foura. E la mamma cun seis uffants? Co cha la legenda raquinta sun els chaminnats inavant fin sün Plaun Radond, ingio chi sun in ün dandet gnüts petrifichats (versteinert).

Nus cuntinuain cun nossa spassegiada aint da la Val da Teja Fondada. Dürant quista tura fascinanta in quista bella val



Fögliä chamuotsch sflurida

sulvadia, gnina nudrits cun bleras infuormaziuns e spiegaziuns sur da tuot quai cha nus inscuntrain o chi'ns vain sper ils peis. Bulais, fluors sechas, però eir talas chi flurischan massa bod, crappa, plantas, differentas chaclanas, pails, ed oter




plü as chatta be sper la senda. Severin Hohenegger spiega in davoman sur da quai ch'el vezza e prova da sensibilisar cun gronda persuasiun a seis accumuladers per las bellezzas, per las particularitats, per las singularitats da mincha detagl da la natüra, cha tala douvra per as colliar ed ultimamaing fuormar ün'unità, per pudair viver e survivor. El muossa via sülla necessità d'avair chüra da l'ambaint, per cha eir las prosmas generaziuns pon giodair üna natüra intacta, apunta sco chi's chatta hoz amo in Val Mora ed in sias vals lateralas. Rivand aintasom la Val as muossan duos boccs da capricorn chi giaschan in tuot-

ta calma sün üna grava. Pür davo avair surgni ün pa vent da nus i'l nas, as vaintan els e's mouvan plan planet sü vers la gripa, ingio chi's chattan plü sgürs e's giaschaintan danövmaing. Pel giuven Thierry es quai ün dals mumaints culminants a pudair observar a quistas bes-chas superbgias e fascinantas tras il perspectiv.

Davo bundant 7 uras finischa la guida culla famiglia Flückiger. Sün mia dumonda, co cha la gitta tils ha plaschü, respuondna il seguaint: Nus eschan fich cuntaints e grats ch'avain pudü accumulagnar hoz a Severin Hohenegger sün quista bella e fascinanta gitta. El ha fat sia lavur fich bain, in möd calm e cumpetent. Nus vain pudü imprendar bier e per Thierry s'ha hoz accumulü ün sömml. Las bellezzas da la Val Müstair s'han fat gronda impreschiun, uschè cha nus visiteran quista regiun bainbod darcheu üna jada.

E sco pled final vögla be amo dir il seguaint: Il guidar persunas sün spassegiadas nu vuol be dir da manar quellas d'ün lö a l'oter, na, üna guida da viandar scolada po spordscher e dar inavant fich biera savüda a sia cliantella, grazcha a sias grondas cugnuschentschas sur da la natüra, da la cultura, da l'istorgia, e bier oter plü!

A.L.



Fotografia: Severin Hohenegger